

FESTA SAGRADA FAMÍLIA – TINAN A

Tema

Leitura sira domingu ne'e nian komplementa malu atu apresenta koordinada fundamentál rua atu hodi harii família sarani: domin ba Maromak no domin ba sma seluk, liuliu sira ne'ebé besik liu ita – inan-aman sira no familiár seluk.

Evanjellu subliña, liuliu dimensaun Maromak nia domin nian: Maromak nia projetu tenke sai prioridade ba naran sarani ida, ezijénsia fundamentál, no ezijénsia seluk submete ba nia. Família sarani harii iha respeitu absolutu ba projetu ne'ebé Maromak iha ba ema ida-idak.

Leitura daruak subliña dimensaun domin nian ne'ebé tenke suli husi ema hotu nia jestu, ema sira ne'ebé moris “iha Kristu” no aseita atu sai Ema Foun. Domin ne'e tenke atinje, ho forma espesiál, sira hotu ne'ebé ho ita partisipa iha espasu familiár no tenke tradús iha atitude sira kompaixaun nian, komprensaun nian, laran-di'ak nian, respeitu nian, partilla nian, servisu nian.

Leitura dahuluk apresenta, ho forma prátika liu, atitude ruma ne'ebé oan sira tenke iha ba inan-aman sira. Ne'e mak forma ida atu konkretiza domin ne'ebé leitura daruak ko'alia.

LEITURA I – Sir 3,3-7.14-17a (gr. 2-6.12-14)

Livru Ben-Sira nian (hanaran mós “Eclesiástico”), husi ne'ebé foti leitura dahuluk domingu ne'e nian, mak livru sapiensiál ida ne'ebé hakarak apresenta reflesaun ida ho karáter prátiku kona-ba arte moris di'ak no haksolok. Ita iha inísiu sékulu II mK, iha époka ida iha-ne'ebé elenizmu hahú ona tau iha perigu kultura no valór tradisionál sira Israel nian. Jezús Ben-Sira, autór livru ne'e nian, aviza israelita sira atu keta lakon sira-nai identidade kulturál no relijioza. Livru buka apresenta sínteze relijiaun tradisionál nian no matenek/sabedoria Israel nian, hodi subliña valór judaiku nia grandeza no hodi hatudu katak kultura judaika la lakon ho kultura grega.

MENSAJEN

Testu apresenta indikasaun prátika ruma ne'ebé oan sira tenke tau atensaun iha sira-nia relasaun ho inan-aman.

Liafuan ida ne'ebé temi maka'as mak “hamta'uk” [onra]. Liafuan ne'e lori ita ba ukun-fuan sanulu Sinai nian (kf. Ex 20,12), iha ne'ebé ninia signifikadu mak “fó glória”. “Fó glória” ba ema ida katak fó importánsia tomak; “fó glória ba inan-aman” katak rekoñese sira nu'udar instrumentu Maromak nian, hun moris nian.

Rekoñese katak inan-aman mak hun moris nian, no husi sira Maromak haraik moris mai ita, tenke lori ita atu iha gratidaun; gratiduan ne'e iha konsekuénsia iha nivel prátiku. Implikasaun mak tau matan ba sira bainhira sai ferik no katuas no la despreza eh abandona sira; implika asiste sira materialmente – hodi la inventa deskulpa naran de'it – bainhira sira la bele ona serbisu (kf. Mc 7,10-11); implika la halo buat ruma ne'ebé halo sira la kontente; implika rona sira, tuir sira-nia orientasaun no konsellu sira; implika sai laran sadia ho sira nia limitasaun sira mai husi sira-nai otas boot.

Nu'udar rekompensa ba atitude “onra” inan-aman sira, Jezús Ben-Sira promete perdaun ba salan sira, ksolok, vida naruk no atensaun ba Maromak.

LEITURA II – Col 3,12-21

Paulo iha kadeia (karik iha Roma, tinan 61/63) bainhira hakerek ba sarani sira iha Colossos. Molok ne'e, Paulo simu notisia ladun di'ak kona-ba comunidade Colossos nian. Notisia sira ne'e ko'alia kona-ba doutor lokal ruma nia tendensia perigoza, ne'ebé hanorin doutrina laloos no hadook sarani Colossos nian husi lialoos Evanjellu nian. Doutrina sira-ne'e kahur pratika legalista, pratika axetika, espekulasaun kona-ba anju sira no hanoin katak elementu sira ne'e tenke kompleta fiar iha Kristu no komunika ba fiar-na'in sira koñesimentu aas liu mistériu sarani no moris relijioza ida ne'ebé auténtika liu.

Hodi la hewai doutrina sira-ne'e ho modu diretu, Paulo afirma katak Kristu de'it naton no tau Kristu aas liu iha kriasaun tomak no iha ema nia redensaun.

Testu leitura daruak nian pertense ba parte daruak surat nian. Hatudu tiha Kristu nia supremasia iha kriasaun no iha redensaun, Paulo aviza sarani sira Colossos nian katak uniaun ho Kristu lori konsekuensia sira iha nivel moris pratiku nian: implika hakribi “ema tuan” egoizmu no salan nian, no hatais ho “ema foun”.

MENSAJEN

Moris nu'udar “ema foun” implika kuda virtude lubuk ida nu'udar rezultadu uniaun ho Kristu: laran-sadia, haraik-an, pasiensia, laran kmaus. Fatin espesial fó ba perdaun ba maluk sira nia salan, tuir Kristu nia ezemplu. Virtude sira-ne'e mak ezijensia no manifestasaun karidade nian, nu'udar ukun-fuan fundamentál ba sarani sira.

Paulo tau virtude sira nia fundamentu iha ezijensia relasaun metin ho Kristu; moris “iha Kristu” implika moris, hanesan Nia, iha domin total, iha servisu, iha disponibilidade no iha don moris nian.

Aprezenta tiha ideal moris sarani nia liña jerál sira, Paulo aplika buat ne'ebé nia foin hateten ba vida familiár. Ba feen sira, nia rekomenda respeitu ba laen sira; ba laen sira nia konvida atu hadomi feen sira, hodi evita dominiu ho forsa ba sira; ba oan sira, nia rekomenda obediensia ba inan-aman; ba inan-aman sira, ho intuisaun pedagójika, nia husu atu keta maka'as liu hasoru oan sira, basá ida-ne'e impede dezvoltamentu normal sira-nia kapasidade nian.

Ho forma ne'e mak, iha espasu familiár, hatudu Ema Foun, ema ne'ebé moris tuir Kristu nia ezemplu.

EVANJELLU – Lc 2,41-52

Evanjellu ne'ebé ohin propoin mai ita mak parte ikus “Evanjellu infansia nian”. Ita hatene ona katak “Evanjellu infansia” nia finalidade mak katekeze ida kona-ba Jezús; iha katekeze ne'e, fó sai sé mak Jezús no prezenta koordinada teolójika ruma ita haree dezvoltave iha Evanjellu ne'e nia laran.

“Katekeze” ohin nian situa ita iha Jerusalém. Lei judaika husu ema sira Israel nian atu bá Jerusalém tina ida dala tolu, iha tempu festa boot tolu peregrinasaun nian (Paskua, Pentekostes no Festa Taka-balu nian – kf. Ex 23,17-17). Maski rabinu sira la konsidera obrigatoria lei ne'e to'o tinan 13, maibe aman-inan barak lori oan sira molok otas ne'e. Jezús iha tinan 12, no tuir Lucas, Nia bá Jerusalém ho Maria no José atu selebra Paskua.

Iha ambiente Jerusalém no Templu nian ne'e mak Lucas situa laifuan dahuluk ne'ebé Jezús fó sai iha Evanjellu. Ne'e mak sentru ita-nia leitura ohin.

MENSAJEN

Xave epizódiu ne'e nian, mak liafuan sira Jezús hateten ba Maria no José, bainhira hetan fali Nia: “tanba sá mak imi buka ha'u? Imi la hatene katak Ha'u tenke hela iha ha'u-nia Aman nia uma?”

Signifikadu resposta nian ba Maria nia pergunta mak ne'e: Maromak mak Jezús nia Aman loos. Husi ne'e ita bele hateten katak ba Jezús, eziénsia Maromak nian mak prioridade fundamentál, ne'ebé boot liu eziénsia seluk. Ninia misaun – misaun ne'ebé Aman konfia ba Nia – obriga Nia atu ko'a ligasaun ho família rasik (kf. Mc 3,31-35).

Iha ne'e mós iha referénsia ba Jezús nia terus/mate/moris-hi'as: epizódiu ohin nian, nune'e mós faktu sira liga ho mate/moris-hi'as, situa iha kontestu paskál; iha situasaun rua ne'e hotu ita haree ema husik Jezús mesak – iha ne'e Maria no José mka husik Nia no ikusmai, eskolante sira – ema sira ne'ebé la komprende katak Ninia prioridade mak Maromak nia projetu; iha situasaun rua hotu ema buka Jezús (kf. Lc 24,5) no Nia tenke esplika katak nia moris nia finalidade mak kumpre buat ne'e Nia Aman hakotu ona (kf. Lc 24,7.25-27.45-46). Lucas apresenta iha ne'e xave atu komprende Jezús nia moris tomak: Nia mai mundu tanba Aman nia mandatu no ho projetu ida salvasaun/libertasaun nian. Sira nee'bé husu tanba sá mak Mesias tenke halo dalan determinadu ida, Lucas hatán: tanba ne'e mak Aman nia hakaran. Atu kumpre Aman nia hakaran mak Jezús mai atu hasoru ita no tama iha ita-nia istória.

Iha kestaun rua seluk ne'ebé ita hetan iha leitura no serve mós ba ita-nai reflesaun no edifikasaun: dahuluk, ita haree Jezús nia entuziazmu ba Maromak nia Liafuan no ba kestuan sira mai husi Liafuan; daruak, “deklarasaun independénsia” Jezús nian, bele tulun ita atu komprende katak família la'ós fatin taka nian. iha ne'ebé ema limita ema nia baburas, maibé fatin ida iha ne'ebé ita loke an ba mundu no ba ema seluk, iha ne'ebé ita prepara an atu konkista mundu ne'ebé hale'u ita.